

若因未備辦自費資用通候到京照數補給
若別有名師名器名工前項開載未盡者地
方官能一一訪求量行募送買解具見體國
忠誠合行紀錄伏乞

聖裁

一議勸義伏見兵興以來臣民慕義捐貲者如
委壑逝波不見其益且未立賞格人誰樂從
職以爲輸財助餉不若使輸餉募兵也以官
選兵不若使人人選兵也請定爲三議激勸
之法其一有財者自選壯士給與安家銀兩
盤費到京依式製造精好器甲着伍之後官
給糧餉者名曰義募所募之士聽職等選中
類爲一營曰協忠營後來兵士得有功級其
募者酌依斬獲功級事例每二十級准敘一
級其一有財者自選自餉安家器甲行月糧
俱不煩官着伍之後不論年月通行資給名
曰義餉所餉之士聽職等選中類爲一營名
曰大義營後來兵士得功一級其餉者亦敘

一級此外有不輸貲財而能結識豪傑招揀
着伍者名曰義薦聽職等選中卽于兵士冊
籍填入薦者姓名給與執照後來所薦之士
有積功至指揮僉事積賞至十級以上薦者
分敘一級願賞者聽其三項義人陞至指揮
僉事以上願就文職者分別品級從優改授
與恩廕等官願以功贖罪者酌量情罪輕重
功級多寡准與減免文武職官廢閒在籍者
酌量起用若三義人身在行間別有親斬功
級者另自陞賞不相侵併其餉至十名以上
募至三十名以上薦至十名以上者所在官
司或送扁額或行獎賞先示勸勵如此人自
擇人搜採必精義士不枉費兵伍得實益矣
但職所統率盡是腹裏平民生來未見兵革
非以厚餉重賞堅甲利器車良馬驟教練成
就尚不堪爲援遼之用况于自募自餉者豈
容勉強調發以塞向義之途須練成之後人
人賈勇然後惟

皇上所用耳伏乞

聖裁

○直隸蘇州府吳江縣舉人范世文題爲逆酋犯
順叵測遼城攻圍在邇仰祈

聖明指日臨御召對文武大臣以集忠謀以安
宗社事下第將圖回籍正值奴酋聲勢猖獗悉心
條列戰守機宜共二十六款于六月上瀆
宸覽未奉

聖旨發落本月十六日塘報奴酋已攻陷開原近

又踰鐵嶺擒宰賽并破北關矣復聞經畧熊
廷弼到任止有疲兵一二萬人器械衣甲俱
無糧餉軍資胥乏兢兢歛守遼城以外不復
能顧此正危急存亡之秋也况今日之遼城
非舊日之遼城也舊日有北關尾其後有鐵
嶺遮其前諸酋頡頏不相上下所以議戰守
今酋復何所顧忌哉儻一且不支毋論捐此
數十萬生靈實

神京失其翼蔽長驅而來或潛趨薊鎮或襲攻

山海未審今日之邊防今日之將士何以禦
之且招募之使四出潛啓奸雄窺伺之心卽
安然應募而來長途之勞頓冰雪之饑寒旣
不勝其悽楚况到遼城以枵腹而當彼悍賊
何以決勝也且廷臣之請餉者屢矣

陛下不以此時給發謂此阿堵之物一散何時復
聚不知天地生財原足供

聖明之用歲歲用之歲歲生之與其愛惜于一時
釀不測之變倘疆場一日未靖每歲軍資數

百萬之耗如漏卮而無有已時也今海內智
勇之士十倍百倍勝奴酋者不少也日覩

皇上不接見臣僚不優卹將卒以爲似不以東事
爲重卽奮身擒滅奴賊恐有功終不行賞所
以隱匿不出誠

聖躬勤御文華殿集閣部科道諸臣籌議選用何
將調用何兵戰守出何方畧糧餉發何倉庫
廟筭定則威武揚自有豪傑起而任事矣目今保
守遼城之策須料賊必從何路而來我兵必

從何路而備臣嘗留心遼左地形如葫蘆西
狹而東寬由山海至寧遠尖稍也廣寧錦義
上截也三汊頸也開鐵遼瀋金復海蓋下截
也今守禦宜宿重兵于海州保三汊之左臂
以卵翼遼陽然須石門嶺有屯以攔其來路
駱駝洞有伏仰河側有伏虎皮驛有伏以衝
其兩脇而代子河之澚有堦以邀其半渡遼
城庶幾可守耳此在我所必備之路也賊自
去歲迄今殘破諸城堡及宰賽北關富強之
形已恃入寇之勢已張及今秋高馬肥必分
彼醜類一從撫順之剝刀山出以攻我金復
海蓋一從清河之鴉鶻關出以搗我遼瀋而
渡三汊一從鐵嶺之靜虜衝出以趨我薊鎮
一從三岔河由登州出以截我天津糧餉而
我無如之何也此逆酋必由之路也今募兵
緩不及事亟宜僉遼民給以衣甲器械資之
糧餉以遼守遼所謂取近水救近火人和卽
多助也今詞臣徐光啓願統四路招募之兵

操練通津以備戰守此國家二百五十餘年來養士之報也但烏集之衆強弱異資材力異用訓練之兵宜揀貧窮失志忿怨思奮并勇力出衆者聚爲一等可使衝圍破壘填濠砍寨之用揀馳馬善射并疾趨善走者聚爲一等可使射賊主將探偵埋伏之用練憑河沒水知山麓險阻者聚爲一等可使偷營焚積鄉導引路之用古云貧者好趨利愚者不顧身疲癯殘疾者可防守倉庫故訓練不同歸于制賊如但擇取精壯棄羸弱而不收則窮無所依流而爲盜矣又破賊勢全恃火器卽烏銃一事煉鐵貴于精堅而渣滓洩漏打造粗疎鈕絆鬆脫火門艱澁管不圓滑架不平準皆致敗之道也禦賊馬全賴車陣而拒馬一器木宜用大鐵宜用輕蒺藜宜用小上宜藏連弩施放按節儻山路崎嶇深入曲奧賊穿地爲溝礙以積土覆以陷坑亦必敗之道也惟用醉馬砂拌以黑豆足困酋馬三者

必訓練精熟方可出奇致勝卻賊遠遜然後
用陸兵則屯據開原清河撫順慶雲鎮西與
北關之故墟而修築必期堅完開原內宜築
夾城伏地道外宜深掘濠塹以爲萬全無虞
之守如大舉征討則前疏疊陣兼攻之法樹
竿瞭困之機石城置礮之策所宜預備者也
用舟師分載天津糧餉佯以海運爲名一從
登州東至橫江以瞻寬奠北至金州以疏旅
順三貝一從北新口與蓋州之娘娘宮以轉
三岔河一從鴨綠淺由狼家塞乘酋之不備
以搗其巢或驚酋之後門以分其勢此今日
用兵方畧也防守根本之地在練京軍原額
四十萬餘今止十一萬餘矣太倉老庫之積
國初二千餘萬卽萬曆二十年亦三百八十
萬餘今止聞有八萬餘何以耗竭至此保
神京宜速清影射之冊革除冒替之糧攢操三
輔之兵嚴防薊鎮之寇皆今日所當亟圖者
也臣書生不知用兵緣感啣

聖明曲成之恩矢志殉忠如

皇上不以言之越分爲謬

勅下該部科叅酌可否取裁

○工科給事中祝耀祖題爲遼將約束方新經臣披瀝晷苦懇乞

皇上申飭舉行以重事權以明紀律以實行伍事
竊惟遼事大壞多因將先怯而兵先逃以勝
予奴而非奴能爲可勝也是必將兵之得其
道而後心志齊一樂戰如飴又必將將之得
其道而後饑寒軫念撫卒如子蓋未有將不
廉而可以統衆亦未有法不肅而可以馭將
者也經畧熊廷弼受事以來弔死扶傷誠動
鬼神之泣畫地列戍營堅壁壘之雄可謂徹
底精神折衝氣槩而晷稱激勵士心振刷積
習無如斬三懦將并斬貪將陳倫以不辱
尚方劔而未甚者許以自新但治亂用重雖中
今日膏盲而勅法明刑易府諸將怨讟則
廟堂之上何可不獎慰其忠勤而

綸綽之頒何可不并責于道鎮非謂獎慰之足以
作廷弼也蓋奉闈內傳宣則事權益增而重
卽不怒而威于斧鉞也非謂道鎮之足以代
經畧也蓋萃職業稽查則軍餉不射而糜是
衆用其威勝于用斧鉞也張弛存乎變化安
危判于俄頃須在諸臣戮力效命保有遼陽
而後中國有制勝之地又在廷臣僉謀協慮
善成廷弼而後疆場有制將之人此臣所爲
愀然動色而怵然却顧也至于土兵素嫻山
戰與奴技適相當調用二萬領以土官統以
夙將及擇道臣有風裁者沿途彈壓使無驛
地騷擾洵爲得筭第水蘭仇殺怨深莫解同
調固虞見敵而馴戢之難單調又恐空巢而
吞噬之易是在兵部叅酌強弱先後撥調俾
不疑二致釀他患乃若缺將坐請以充營練
之選罪弁速釋以支目前之危如舟涉河海
亟需舵楫有一不備以當駭浪其何能濟而
覆疏惟樞臣獨斷安可首尾牽制而冥冥決

事哉且中國禦虜長技莫踰火器頃職發過
兵仗局盛甲兩廠大將軍旋風虎蹲神鎗銃
砲等項約二萬餘計月內可到遼陽而人與
器不相習則臨陣而膽先戰雖有神器莫彰
其功諸臣累疏既稱張名世精工絕倫何爲
幽囚使不得出以專職教演矧戴罪立功律
所明載則周敦吉張神武麻承恩等並宜使
過早收一臂之用先是臣疏謂累年熱審不
報詔獄印官不報園土有夜哭之鬼肺石多
覆盆之冤然怨氣疑結上干天和其在凌遲
處死者罪大而不可解法重而難輕斃也苟
情有可原奸不爲首莫如赦死改戍于遼其
素封扞綱將官失律追其貲財半贍軍需舉
凡有力之家皆得酌量多寡贖罰自備盛甲
器械而後遣戍則性命之保爭先樂輸而緩
金之入兵饒不匱或亦救時一說蓋四郊多
壘內變宜防直待虎出押而橫噬人動搖根
本嗟無及矣統惟

聖明留意省覽施行

○經畧熊廷弼題爲酌調土兵以資征戰事職惟川將周世祿等所領川兵心膽齊壯器械精利而營伍亦安整不亂可謂步兵之勁周世祿等曰此所募漢土桑兵也猶多參差不一若以真正土官領真正土兵更有十倍于此者職思寬奠清河潁陽一帶皆山林險峻非騎兵決勝之地惟土兵騰山跳戰正其所長但昨兵部疏調四萬貳數較多不但沿途苦于驛騷亦且到遼費其安置况安舍水藺互爲仇讐而同調同徵誠有如戶部主事楊嗣昌所慮者以臣酌之但再精選土兵二萬合見在川兵用一大將爲土司素服者統之以當一面亦庶其可也湖廣宣慰司彭元錦忠義自許願統萬眾征賊立功督臣汪可受亦曾咨職疏調據咨統兵知州田萬年呈稱原調三千之外再加五千共爲八千或總調其一萬自開之數亦只止此今若調至一萬五

千多而不精未免虛冒叅雜之弊不若照其自開數目或止八千一萬責令元錦親自領來免至前番騷擾州縣中途逃散爲該司世世効忠之辱如不親領仍遣土舍目把無所約束則屯兵斷不可用當另調施州衛十七長官司兵三千保靖宣慰司兵四五千麻陽兵三千責令各土官親領而統之以荆夔守備及鎮筸叅將以來其精悍不下永順而易聽令亦便計也四川永寧宣撫司馬步兵五千須奢崇明與其子奢寅親領而統以緣事都司張神武西陽宣撫司兵四千須冉躍龍親領而統以緣事叅將周敦吉石柱宣撫司兵三千須秦氏子馬祥麟及其兄秦邦屏親領而統以見任叅將童仲揆前項各兵又須一夙將爲總兵官如貴州副總兵陳宣或四川副總兵陳策爲大帥統之向來土兵止于附近省分調遣故官無加銜之例兵無安家之例今自西南極于東北道遠疲苦體恤當

周彭元錦及土司正官俱應加銜以示優異
各鎮調一兵費三餉而此獨斬一安家銀兩
非公也亦應破例處給以示鼓舞又聞土司
發兵不聽查點數多不足今元錦領兵報效
必無此事况山海關逐名點放弊亦難容設
或仍有匿冒及土司官不親領兵而止遣目
把土舍因而沿途耽延擾害州邑者當降其
祖職級銜以示懲創至于離鄉去井言語不
通所過地方畏于交易飲食歇宿或相避拒
夫車應付動輒留難因而生事情勢必然此
亦經過地方不善體恤之過也應照先年道
臣王士琦領川兵赴朝鮮之例四川湖廣各
委該道文武有風裁者一員統領前項官兵
到遼陽交割一以彈壓各兵使無放肆一以
諭令州邑使善調停如果一路無犯赴限無
違容職咨部立加優陞以酬賢勞伏乞

勅下該部即日覆行

○江西道監察御史唐世濟題爲國勢危亡日迫

聖心悔悟有機乞亟燭塞蔽之奸以振式微事竊
自奴酋犯順狂勢日張殺將隳城殆無虛月
今三韓半爲左衽瀋陽棄而難守僅僅以遼
陽爲孤注矣若遼陽一失則各邊戎虜必蜂
起莫支內地萑苻且乘釁竊發三輔搖動
九廟震驚變亂危亡實在呼吸頃大小臣工叩

閤呼籲

天顏幸

聖心稍動連有檢發之傳且旋下徐光啓姚宗文
等數人然與其急而後用捧漏沃焦皇皇無
及于事孰若先時而用俾從容料理悉心展
布用一人收一人之效乎前見宗文夙夜圖
謀欲激勵北關因招連西虜深得以夷攻夷
之策撫臣周永春臺臣王象恒屢疏言之今
北關已滅亡無及其子孫部落豈無子遺謂
亟宜訪求而存卹之招徠安插暫處之開鐵
間仍加以官爵統其部落一以獎向來忠順
之義風勵屬夷一以激後來報仇雪耻之心

張我犄角此目前竄不可緩者朝鮮興師助
順屠戮萬餘人亟應格外犒賞吊死問生慰
彼忠魂作其後效

特勅宣諭令練兵萬人遙駐江上以爲聲援俾奴
酋有內顧未敢肆焉長驅此應敵最急之着
奈何置之不省也至挑激兇慙抄花諸虜爲
我用永春欲請宗文出關共籌三表五餌之
奇但前奉

明綸未便徑往樞臣宜蚤爲畫一之論再一申請
勿致兩相擔悞耳詞臣徐光啓奉

命練兵昨見其條列諸款胸中已有成筭行且次
第舉行職愚以爲練新兵尤宜兼營兵京營
十萬貔貅數非不足也皆經臣等點閱其中
膂力強壯騎射精通者亦不乏人總協巡視
諸臣向來操有常期亦有常套不過擺列方
陣衝打鎗砲日中而散一出營門掉臂不顧
若散操稍遲卽嘖有怨聲欲時加訓練勢不
能也職愚以爲練兵之地須駐通州衙門不

必創造人役不必增設于事甚便營兵時抽數千更番往練選鋒每月雙糧出操者給與折色銀一兩單糧者每月五錢再行糧每日二分當此米價竄賤時人心欣動且留太倉九年之蓄以備緩急不時之需計莫便于此者光啓此舉部臣須之彥曾兩任浙中清絕一塵才恢八面盈庭之臣共知之相與同心協力可謂共事得人似宜加罔寺兼職方司職銜與京營原有統轄處之得宜事乃有濟若夫練兵莫先擇將營將錚錚如江應詔鮑承先戴光裕等陸續皆去今毛有倫等復調冀北幾于空群營將俸入甚薄原無蓄養家丁其往也不過一夫之用留之寔有益于行伍頃見詞臣疏議留王光有爲練兵職以爲如有倫者所當併留者也又捕營提督舊者已遷將行新者方補未至叅將陳國策出入戴星不憚劬勞偵巡之法稍稍改觀若提督與叅將一時並去當此奸細窺伺之日豈

宜弛備懈嚴如國策者併應議留以飭捕務
者也新經畧急于用人共宜曲體但九十三
人中不爭此一二衡人地之緩急當調當留
在樞臣斟酌行之總之爲國家計安而已昔
人有云多難之國如乘漏舫時時補塞猶恐
變起倉卒若復悠悠忽忽漫不經心載胥及
溺在反掌間耳昔秦以待詔司馬門三日不
報遂亡天下今之槩從寢閣何啻三日伏惟
皇上惕然思瞿然儆念大厦將傾採盈庭讜論亟
頒罪已之詔以鼓天下人心亟正楊鎬李維
翰李如栢之辜以振國家法紀以破揣度群
疑一切章奏旋下獨斷獨行毋聽宵人敵不
足畏之說爲忠言毋信日逐小單開報事件
爲耳目俾海內仰

聖意漠然迅風霆而昭雲漢煬竈無蔽其明城社
無營其窟撻伐之烈豈不計日可待哉

○經畧熊廷弼題爲遼城兵馬雖多挑選十不得
一二謹據實報聞懇乞

嚴勅各鎮精選援兵無徒虛數搪塞以重實禍事
職初入遼時凡馬兵稍堪戰者盡發瀋陽防
守虎皮驛接應而在城瘦弱者不及二千自
榆林援兵與開原道所募兵至始得馬兵六
千人而皆遠來疲乏不堪戰職心危之猶意
賊畏職虛名或不敢遂窺遼陽但于城外分
布七營撤川兵下城虛作聲勢自遼人不可
鼓以忠義編派守城皆避匿不出不得不復
調營兵萬人貼守城堞而遼兵亦虛矣自北
關一陷遼瀋官軍皆哭泣埋怨迯者踵接而
遼城益不勝其驚恐矣此職所以不得不從
部道鎮將及鄉官士民所請而併兵于遼者
一以救瀋陽二萬官軍之命一以安遼陽數
十萬生靈之心而且欲大集三軍挑選精銳
示若進討者以疑賊使不敢來卽來而吾力
稍厚或有以待之非徒而已也于是椎牛數
百頭市酒數千罈蒸胡餅數十萬集官軍教
場自初七起至初十止一連大饗四日風聲

頗振及職與監軍御史陳王庭部道鎮將單
崇等遍歷各營看驗盔甲馬匹弓箭鎗刀等
項每應手抽一弓弓輒斷取一箭箭抽半截
驗一刀棍而刀不能割鷄棍不能擊犬者皆
是物也一一舉示諸將諸將惶恐無以對職
恐風聞于賊遂不復抽但密囑諸將速換速
換而已敗回殘兵久屬無主零星雜亂原不
足觀而河東總兵坐府內丁一千一百餘名
逃去四百八十名旗鼓千把總李養棟等十

數員皆竄匿廣寧不肯出南兵虛而猾所恃
篋筮及枯竹鎗多不中用真保薊鎮兵僅可
守城本地新募兵僅可裝營川兵心力頗齊
而皆徒步甘固兵火器頗熟而無鎗砲榆林
兵多堪戰而原來馬二千匹倒死三百七十
餘匹餘將瘦弱不堪宣府兵不但馬多倒死
而人人傀儡不知該鎮何處覓此一種發來
充數至于盔甲馬匹器械等物營營俱缺滿
場氈帽衣衫短刀彎棍每一着眼令人短氣

時計馬步官軍不下八萬而及總兵柴國柱
李光榮賀世賢分督諸將挑選精銳堪戰者
勉強補奏僅得一萬五千有奇而已職嫌其
少促令再挑三帥苦告不能多也兵之有名
無實蓋如此其亦幸而從衆人之請併之于
遼陽耳假令終守職之初意悉令防瀋不愈
分其力以益其寡而爲賊所乘耶今除前挑
馬兵外步下壯士尚可再得萬餘無奈要馬
馬不得要盔甲盔甲不得要火器火器不得
要刀鎗刀鎗不得要弓箭而遼東弓箭已盡
頃差咨督臣轉行薊鎮各營官軍那移抽買
見成弓箭而亦不得卽到職惟有搓手頓足
付之長嘆而已除日前訓練見軍誠勵諸帥
整頓器械張疑設伏勉強支撐以待援兵外
而更無別法惟是各鎮諸臣不肯效同舟之
誼凡調一將皆執留不發凡遣一兵皆留精
銳自衛而別倩孱弱不堪者以搪塞了事曾
不念此一兵來有行糧有內顧又有募補之

費一人三餉而竟不得分毫之力既以恇怯喪中國軍威又以虛糜重海內隱禍有公忠爲國之心者亦宜置念伏乞

皇上查職前疏所討將官兵馬器械等項欽限催發并乞

嚴勅各鎮以後發來人馬各要一一挑選精壯使遼東得一軍卽有一軍之用得一馬卽有一馬之用不致仍前有名無實以速重鎮之危亡而長貽

聖主之憂慮殘遼幸甚

○南京禮科給事中晏文輝題爲計臣爲國行權主上恡財加法輿情大拂邊患莫弭懇乞

聖明轉念遠慮足食足兵以救危亡事臣閱邸報見戶部堂司因遼餉之催促值倉銀之空乏集衆議借金花急湊解遼以救燃眉隨圖補還以供內額相時用計天下方謂其得急公之義先題後解天下方謂其無擅動之愆視汲黯之矯詔發倉尤極委曲有臣如此是勇

于擔當善于調停者也乃今

皇上不以爲忠而反以爲罪于堂官李汝華則罰俸以司官鹿善繼則降級夫豈不知遼餉之缺甚哉又豈不知金花之借非得已哉惟是愛財心勝各出意堅若曰如是以重處之自後諸臣畏而不請內帑可以無發也臣則曰如是以重處之自後衆心失而難收內帑終不能保也何也忠臣事君有死無二在李汝華久篤勤勞俸雖罰而念不休在鹿善繼雅

負氣節職雖降而心不怨在中外大小臣工如李汝華鹿善繼者心專報國卽法雖峻而志不隳但庸衆聞之必將謂數萬之銀尚不能割奈何責我之割囊橐以輸邊也而慕義之徒沮矣將帥聞之必將謂數萬之銀尚不肯捐奈何責我之捐身軀以赴敵也而死綏之士退矣兵卒聞之必將謂數萬之銀尚不能捨奈何責我之捨肝腦以塗地也而赴鬪之衆怠矣酋虜聞之亦必謂數萬之金尚且

慳吝是奈何能足軍馬以與我爭衡也而輕
中國之心益甚矣所惜者小所棄者大所罰
降者少所解體者多臣竊謂

皇上之計左也况以今日事勢而叅諸今日之傳
聞又不容不蚤爲之計者乎近有自奴寨逃
回者云奴酋志甚大謀甚狡機甚密我之偵
彼也百不得一彼之偵我也百不失一去歲
遣人取北京南京山陝地圖今歲遣人盡登
萊天津淮揚海口川谷關隘去歲遣人往蘇

杭織造今歲遣人往省直置買貨物姦細遍
滿于天下智畧填塞于胸中自我三路喪師
後妄謂天意在己議今冬盡破河東之城使
我無屯兵之所旋而滅北關滅朝鮮使彼無
內顧之患議來春一由水路向登萊而進取
山東南京一由水路從天津而截漕糧截東
西道使北不得南轅勾夷攻山海攻薊門勾
虜攻宣大而今年四月間又差人持物賄倭
促其來春寇閩越吳楚而彼直抵都門以行

金人故事逆酋志不在小矣風聞如此雖未足盡信設萬一是實處處單弱在在孤危北不能守南不能支我瞻四方蹙蹙靡騁卽有瓊林大盈之積不過資盜糧而已故臣謂衆心失而內帑終不能保也與其終不能保孰若蚤發之發之蚤則救之速外財尚可收其半而內帑亦可保其餘也故爲今之計宜速發二三百萬選將練兵置器行間應熊經畧之手而毋掣其肘俾之固守遼陽捱過秋冬宜速催省直派括錢糧新募兵士急赴遼陽聽熊經畧之分練而毋催其戰俾徐復開原保全春夏而又增金蓋登萊天津之兵以禦于水增薊門九邊之師以拒于陸庶幾可轉危而安轉亡而存也更今

皇上于經畧之有罪者逮矣于閣臣之應用者黜矣是亦轉念求治之時也儻大小諸臣力爲茅焦之請則

聖主奚止秦帝之悟將必允借允發以救雲夢之

失而殄遼左之禍矣至已降之官則在當事者曲體君心早還舊物毋終令

聖主有寶金玉不寶善人之誚是猶天下之同以爲願者也

○巡視工科給事中范濟世題爲信地關係匪輕營軍操練有法敬陳膚見以遏強寇以固

神京事職奉

命巡視京營前條陳欲令六副將各分信地立營操練軍士者蓋謂京營共軍士十萬餘分爲

六操每操幾有二萬人職每下營抽籤較藝二十籤可以得一千人止矣外此扼于賞銀勢不得過多也是一千人也弓箭手射六矢火器手打六砲鎗刀手舞一會技止此矣不得復較也其有射箭不中放砲無聲并不能輪刀舞鎗者或責三棍或責五棍法止此矣不得加多也夫以二萬人中止較一千人而又人較六矢或六砲或鎗刀一會其不能射中放打輪舞者責不過三棍五棍如此而欲

武藝精熟職知其必不能也故莫如各分信地使將領分頭操練如今題過每營軍士六千名查無盔甲者人與之盔甲無火器者人與之火器又分作二班每班三千名其將領等官每人領一百名或二百名使之竟日打放其大將軍二將軍等大砲守城立寨最爲要緊須演放慣孰知其一打數里庶乎遇賊可以措手其餘軍士不及演習者使之平治營盤挖掘濠塹庶二三月中火器可精營塹可成然必厚加糧餉使人樂爲用庶幾事皆可爲不然彼原辰巳時放操今竟日操練彼必不受卽以法繩之非喧譟則逃走耳不然當立稿于營盤安能以枵腹之人久待也此議操練併當議糧餉者也其信地一節今日安營交寨用以操練軍士卽異日用以外禦強虜內固都城者也關係最重不可苟且須外挑濠塹或寬二丈或一丈五尺而深如之內築垣牆或高一丈或七八尺而厚如之使

我軍得以站立庶乎臨時可以施展又須地勢高阜寬廣一望可見五七里用砲亦可打五七里庶不爲賊人所乘又須營勢彼此聯絡可以援救如賊攻城我用大砲從營中擊之使不得近城如賊攻一營左右兩營各用火砲從營中翼而擊之庶可以持久如舍濠塹而用戰車拒馬木以立營若舍大砲在營中擊打而欲用鎗刀弓矢馬上搏戰以爲救援職又知其必不能也昨職同總協諸臣城

外觀看各營信地大約皆在窪下之處人既不能遠望砲亦不得遠擊萬一賊人簇擁而來彼憑高臨下矢石所加如投之井中我仰面應敵又無救援此立盡之術也職又知其必不可矣職爲此言不惟人笑其非職亦不敢自以爲是以職未見戰陣徒以臆言之也兵何事而可以臆言之乎使今日營地果異日無所用可高可下無所不可萬一天不厭禍虜騎長驅城下安營以爲扞禦此塊地不

惟大衆生命所係乃國家安危存亡一大關鍵可草草視之耶故職合日寧可不當言而言以取失言之咎不可當言無言而使後日有不言之悔也此亦大小諸臣當共講求者也此議立營併當議地勢者也抑職又有說焉前臺臣王象恒言山海關當修築墻垣挑濬濠塹此喫緊之着也而京都城濠幾與路平亦當及此時挑濬使深濶如舊式計二處所費不過十餘萬金惜此小費而忘設險之義當事者之罪也大抵今國家之患在各齎又在忽緩使當三路大敗後調兵遣將押運盛甲火器有如今日急急皇皇不暇寧處新經畧到彼亦可接濟何至如今兵不及調將不及遣而盛甲火器且恐爲盜資也豈不惜哉今言修山海墻濠置之罔聞言修京都城濠置之罔聞言揀擇各營信地亦置之罔聞不以爲事倘或賊人一旦猝至此非旦夕可成之功也誤國必矣職言官也待人而行不

能使人必行即如戶部不加糧則軍且不能
竟日操練不分營則軍且不能盡人演習職
有何術可以叫徹大

天閣更言挑濠築壘而強人以勞苦之事或其都
城山海又不必言矣

兵不又請謀
皇皇不知寧與
入規與備兵豈深
大計今國定必
籌遼碩畫卷之

臺灣國家圖書館, NATIONAL CENTRAL LIBRARY, TAIWAN, R.O.C.

籌造碩畫

三十二卷

三十二卷

臺灣國家圖書館, NATIONAL CENTRAL LIBRARY, TAIWAN, R.O.C.



籌遼碩畫卷之三十一

巳未孟冬

天都程開祐仲秩父輯

○管理練兵事務徐光啟題爲兵事百不相應微
臣萬難稱職懇乞

聖明速

命廷臣從長議妥以計安攘事臣荷蒙

皇上非常之遇委以練兵事務時臣業于本月十

五日條陳急切事宜十款恭候

命下同各衙門逐一施行然以未奉

欽勅諸凡事理皆約畧言之實不知所練何處兵士爲數幾何也如愚見最多不過挑選精壯二萬人就于京營左右陸續建立營房二千間工部陸續支給器甲車輛材料四十餘萬兩戶部每年支給糧餉五十餘萬一應軍資得各該衙門逐一應手臣再求副二贊畫四五員博選良將數十員一面造器一面練兵一年之後庶幾可用萬一不測未及成軍而醜虜長驅深入重地則先教之施放火器聞

得內府廠庫大小火砲多如山積若以此二萬之衆與京營兵協同守禦再行建造敵臺改造火砲堅壁清野賊雖十萬來攻必令時刻之間盡斃于堅城之下此臣之本計也若製造未精教練未就雖十倍敵人之衆必不可戰遼東三路可爲殷鑒矣然臣近哨之戶部諸臣咸言此餉毫無措處目今通州民兵月給亦係借用不可爲常計在工部亦復不易而通州先到山西民兵數三千尚皆露宿

日今天氣漸寒若非速建營房將何棲止曷
平天津兩處何獨不然然則如臣所計約畧
二萬人衆尚費若干措處乃近聞兵部計將
各省民兵四省召兵并近議召募八府民兵
約共六萬衆分駐三處一切教練盡屬于臣
此則臣力所必不勝亦今日所必不能辦抑
且目前日後皆有危險之形不容不續陳于
皇上也夫承平旣久廢弛已極而遠求精兵未易
言也戚繼光昔時各將身經百戰其在浙江

止能選練三千人爲鴛鴦陣以勝倭然倭奴
亦無大衆後來總理薊鎮譚綸爲總督兩廣
提挈司道偏裨皆一時之選又以浙中舊練
新兵三千爲之基本將欲練兵六萬爲出塞
之舉畢竟不能只得增募南兵二萬月餉悉
一兩八錢教練三年而成又用主兵班軍之
力建造三層敵臺千二百座所以薊門安枕
至于今日然以匹馬不入爲功未能與強虜
決機兩陣間也蓋練兵之初其難若此臣無

譚戚之才無經歷之素無慣戰之精兵良將
欲以一老書生奔走竭蹶令於歲月之間統
烏合之衆練成精兵六萬其將能乎此則臣
力所必不勝者也戶部舊新二餉支吾遼左
尚恐不足新兵糧餉若薄與無兵同即使酌
量中數六萬之衆亦須歲支一百二十餘萬
工部器甲除內府大砲外無一堪用者皆須
新造造不精利與無兵同須應支給料價一
百餘萬兩就得料價而一甲一銃皆須數十

日工何時齊備堪以對敵至于營房一節一
衛二州各該建造一千餘間又須在日今半
月內完工過此沍寒上功難成兵無着落矣
凡此三者皆今日所必不能辦也大衆所在
食用不給衣服不完人情當何如數萬之衆
悉令露處寒風翔雪之中人情當何如旣爾
饑寒救命不給何由朝夕練訓萬一寇至又
負六萬虛名必將責之以戰朽甲鈍戈裸裎
徒跣勝負當何如此則目前日後危險之形

也夫以天下重徵募之兵盡付于臣以索
餉製器建立衙門安插士衆之事盡屬于臣
而且齟齬在前險難在後正如未經力作之
人偶主家事事勢急迫勉強負荷卽一夫之
任尚未知其能勝與否遽以五人十人之擔
悉委之又使履危涉險此其人惟有顛蹶而
已一人不足惜如債事何哉伏望

皇上立刻勅下戶兵工三部會同九卿科道酌議
停當必須用衆六萬於三處安插者戶部合
當預計餉銀若干於何出辦工部預計器械
車輛火藥料價若干於何出給兵部預計馬
匹料草若干於何取用一衛二州三總連令
預計每處兵二萬有無房屋棲止無則作速
安頓建造營房作何措辦可以刻日速完一
一妥當然後倣譚綸戚繼光事例分

命廷臣三人各設副貳餉司贊畫并應用員役分
駐訓練臣之不肖願當其一雖則如此旣成
之後亦只製造大砲分守近畿諸城而已必

欲與奴賊交鋒接刃自非博選天下奇才一
二萬人製造極精器械一人食數人之餉教
練經年必不可用也臣明知無倖可僥而猶
勉強支吾今日知事之不可而謂之可是爲
欺君之臣他日知兵之不可戰而令之戰必
爲債軍之將此兩者臣不忍爲也

○雲南道監察御史王尊德題爲遼陽若陷
宗社卽傾懇乞

聖明速發帑金以濟危急之需以免覆亡之禍事

竊自逆酋犯順以來至于陷開原滅金白

皇上因廷臣叩闈急請丁人政亦有舉行如考選
俞允又十人矣夫言官之設所以植忠讜也今非
彙徵于國家閒暇之時而迫取于四郊多壘
之日非舊制也卽以遼警諭則堂官于職原
擬差守東直門者乃反以按差而出則是職
不得借箸於見形察影之先而又不得效死
于强弩衝城之日亦非其願矣蓋惟

皇上爲左右近習所蔽視遼事若尚未急故如此

今據李光榮塘報則奴賊攻遼陽只在此月
內矣賊旣無北關可虞此番必悉衆來以重
兵壓我遼能支乎若使軍士用命虎懲諸酋
助我遼陽尚有生意而撫臣周永春計所以
處此者必用二百萬金乃司農無可措處自
不得不急求之內帑是此二百萬乃救遼救
京師緊急之着而其實在內帑不過九牛一
毛爾職謂此議旣出諸臣又已請之

皇上則不惟遼軍士知之延頸待哺卽朝鮮虎懲
宰賽諸酋豈不知之而曰中國將有以惠我
乎儻我無以遂其欲則遼軍方思逃死奴酋
方在勾挾諸夷之時虛願不至幡然灰心而
折入于敵則遼盡亡矣遼亡而京師可守乎
皇上能保有此如山之積而不爲盜賊劫去乎則
此數當何如急發諸臣當何如急請者今戶
部亦不必執言千萬使

皇上又疑以爲諸臣大言要我輔臣亦不必遲遲
然強而後可使

皇上謂輔臣原無心苦我無人，有至有不至無日。有請有不請，個個齊心時時泣候，再得完此。二三百萬之局，以濟經臣東撫犄角之用，可也。悲夫！遼東數十萬軍民爲封疆被殺，今數萬窮軍爲封疆死守，而金白二酋不侵不叛。今爲我不屈被滅，皇上能勿動念乎？而後覈夫前此四百萬之費，楊鎬作何支銷？今此陸續所發，道府有無冒破，該係數萬緊急當用之費，該部卽題知徑給而不必請。

旨內而戚里大族連雲廣廈一費不下二十萬，何不倡率多助，以示同休共戚之情？外而戶工關廠所有美餘大處，不下數千餘金，何不各爲捐出，以爲保國保家之計？至于山西懷隆一道，山東長清一縣，二官于昨歲地方加派，皆以自己節省抵完，民無與焉。賢者所爲若此，而况東南財賦之區，各省善僻之地，猥云不足，則兩院當明示以著此一項，爲薦劾之

有無可也若夫川兵旣爲賊所畏則經畧所
請各處土兵該部卽當星夜催督而至于遠
方撫院亦不必論部咨有無俱該便宜調募
設餉遣來急着在京遠之有恃緩着在遠近
之速赴蓋遠兵來而難去故只有戰守之情
更得多來聲勢相倚守望相助豈不得力皆
如川中兩院實心料理調度有法兵餉俱得
其用豈非急公之義乎且事已至此不得復
顧騷擾所當節者京官家眷無故絡繹南回
往往動搖人心騷擾驛遞今後兵部勘合宜
從酌與減得些須供億以奉援兵亦一便也
而職重慨夫瓦解之勢忽見于全盛之時人
諾諾而俱摧氣奄奄而不振千難萬難之餉
以安家行糧而給兵士在途爲亂逃去爲賊
遠無一分之益地方受萬分之害至三韓人
民財貨并各處兵馬器械盡爲敵資楊鎬李
維翰李如栢之罪可勝誅哉幸有熊廷弼整
頓周永春撫卹兩人鞠躬盡瘁儻在一二年

前用之豈惟保遼且可滅賊而今晚矣大厦
已傾恐非一木所能支也天若祚我則惡亮
必有幹曾之禍庶可息肩而不然者存亡之
機決於此矣且就令賊不得遼而我兵安得
不守遼虛海內以供大壞之一隅一切兵餉
所歸如掃雪填井究竟何日且各處旱荒沴
疫所在俱是人皆無固志而有遠心萬一如
劉七者起于其間一唱百和誰爲抵對然則
奴不促我我將自促天下大勢已見于茲何
諸臣之泄泄也職言及此欲叩闕無從伏惟
皇上惕然恐懼卽賜發帑金與羣臣共圖定傾之
計無致噬臍莫及將社稷靈長終賴之矣
○戶部尚書李汝華題爲遼勢甚危遼餉甚急臣
計甚窮謹再合詞三懇

聖明速俞前請速發帑金以救萬分迫切事前舉
朝公議遼左危在旦夕欲急救援惟有請帑
一着是以合疏上請臣復再疏叩闕冒瀆

宸聰冀

皇上試一省覽則危亡之狀已在燃眉未有不憐
臣之苦俞臣之請卽允發帑以救目前之急
者今靜聽數日

俞旨杳然豈舉國以爲急而

皇上固緩之乎近日塘報謂奴志猖獗刻期必犯
遼陽此危急存亡之秋也且遼餉槩加月費
銀三十萬遼餉將絕求接續不可得况調兵
源源方來則費餉浩浩何極蚤夜憂惶不勝
疚心疾首而莫知設法已蓋臣初設法尚可

那借尚可加派尚有搜括至今則更無可借
之門更無可派之路更無可括之孔矣千愁
萬慮無可應手之處千懇萬懇惟有發帑一
着須蚤發乃可以應萬分之急可以救三韓
之危而慰中外臣民之望須多發乃可以鼓
軍士之壯氣可以收將離之人心而明朝廷
之德意卽奴酋聞我兵旣集我餉益充當自
奪氣當自退服將遼陽安京師與之俱安天
下臣民舉安如

皇上不爲介意必悞大事試思

國家更有何事重大試思目前更有何事緊急此之不圖惟金錢是靳豈

祖宗二百年來基業不足爲重惟金錢爲重乎

聖子神孫億萬年統緒不足惜惟金錢可惜乎中外臣民億萬兆生命不可保惟金錢可保乎恐目下奴酋狂逞意在長驅萬一遼陽不保則中原板蕩此時卽盡傾內帑付臣之手臣亦無所措此時卽責臣罪臣而中國已淪于腥羶則何益矣伏乞

皇上立檢前疏如臣等所請照數發出以應蓋當此時勢危急實不能少待須臾者臣等雖欲少待如饑軍之不能待逆賊之不肯待何也其各省直一切新增應解錢糧臣已具題差官星夜催督一時難以蹴至眼前無以應急舍發帑計無復之矣臣等再率十三司官齊赴文華門恭請

○遼東巡撫周永春顯爲河西兵馬單匱懇乞

聖明速勅請兵戍守廣寧及三岔等要地以壯聲援事准熊廷弼咨據撫順關把總許繼盛押解回鄉二名甯成志甯萬全供稱係瀋陽人在撫順地方榆林屯住去年四月被擄去今從新寨子晚間起身從關口進境隨審奴寨情形稱奴賊人馬俱已調在新城要在本月內撫順進搶遼瀋地方等情據此看得奴賊攻陷北關之後杳無動靜固逆慮其必來雖屢經申飭各將領嚴備去後但兵不足合行

急調爲此合咨貴院挑選精銳馬兵二三千督令慣戰驍將統領卽刻前來立等防援等因到職職查得河西兵馬寧前錦義等處二處共調過精銳慣戰者三千五百二十員名無可再調職標下新招家丁三千名除挑選一千六員名護送經臣東行未經發回見在止有二千強半無馬匹盔甲此外有新兵三千無官統領暫委原任遊擊孫守仰督令挑築壕塹見今未完一切訓練蔑如也東事日

急職又挑選一千兌給馬匹盔甲遣發東行
見在止千二百此則俱無馬匹盔甲者也其
正兵左右翼三營原額軍丁八千五百二十
四名除總兵李如楨帶去一千四百八十二
名又各項差役如關西塘驛沿途撥馬及青
黃紅藍旗塘砲捏堡貼防等項二千六百二
十五名見在存城各過往差役者止九百六
十八名此外又有分巡道議兵四百五十一
名除挑去東征一百六十一名見在止二百
九十名此則廣寧見在兵馬之大略也職不
得已將山東步兵二千天津步兵四百與經
臣往返商議留在廣寧訓練其堪戰應急援
兵職俱催發遼陽不敢留一人不敢遲一刻
矣

皇上試思遼陽兵馬將近八萬尚虞難守廣寧兵
馬僅僅如此何恃而不恐耶職竊謂廣寧非
添兵馬二萬不可也然欲守廣寧須先守三
岔河今河東之三岔堡河西之西寧堡兵不